

Ҳар бир саждамиз туфайли бир дона хатоимиз ювилса, қандай яхши! | Ҳадис дарслари (271-дарс)



19:00 / 28.02.2024 2587

عْنُهُ لِلْيَضْرَبْ وَثْنَعْ
عْنُهُ لِلْيَلْصَبْ نَعْلَمْ سَوْ
رْتَكْبَلْ يَلْعَبْ مَلَسَ
أَلْكَنْافِ لِلْدُوْجُسْلَا
كَعْفَرْ مَلِإِدْجَسْهَلْ دُجْسَتْ
أَهْبَلْ كَنْعَ طَحَوْ جَرْدَأَهْبُلْ لَا

مُسْلِمْ طَهْ وَرَّ مُؤْمِنْ دَمْرَلْ وَيْ.

Савбон розияллоҳу анҳудан ривоят қилинади:

«Набий соллаллоҳу алайҳи васаллам у кишига:

«Сен Аллоҳга кўп сажда қилишни ўзингга лозим тут. Чунки сен Аллоҳ учун бир сажда қилсанг, албатта, Аллоҳ сенинг даражангни бир поғона кўтаради ва у билан битта хатоингни ўчиради», дедилар».

Муслим ва Термизий ривоят қилганлар.

Шарҳ: Аввало ҳадиснинг ровийси Савбон розияллоҳу анҳу билан яқиндан танишиб олайлик:

Савбон ибн Юждуднинг кунялари Абу Абдуллоҳ бўлган. Ўзлари Расулуллоҳ соллаллоҳу алайҳи васалламнинг хизматкорларидан бўлиб, Яман билан Макка орасидаги Сирот деган жойдан эдилар. Расулуллоҳ соллаллоҳу алайҳи васаллам бу кишини сотиб олиб:

«Агар биз билан бир оиласда яшашни хоҳласанг, биз билан яшагин. Агар бошқа киши билан яшашни хоҳласанг, ихтиёр ўзингда, сен озодсан» деганларида, бу зот Расулуллоҳ соллаллоҳу алайҳи васаллам билан қолишни ихтиёр қилдилар. Савбон розияллоҳу анҳу Пайғамбаримиз алайҳиссалом вафот этгунларига қадар у зотнинг хизматларида бўлдилар.

Савбон розияллоҳу анҳу ҳаммаси бўлиб 128та ҳадис ривоят қилдилар. Бу зотдан Шаддод ибн Авс, Жубайр ибн Нуфайр, Абу Идрис Ҳавлоний, Абу Салом Ҳабаший, Маъдон ибн Абу Толҳа, Абул Ашъас Саъоний, Абу Асмо Раҳабий, Абу Хайр Язаний ва бошқалар ривоят қилганлар.

Бир куни Расулуллоҳ алайҳиссалом саҳобалардан:

«Қайси бирингиз «Кишилардан ҳеч нарса сўрамайман» деб ваъда беради? Мен ана шу кишининг жаннатга киришига кафилман», деб сўраганларида бу ваъдани Савбон бердилар ва ҳаётларининг охиригача ҳеч кимдан ҳеч нарса сўрамадилар».

Бу зот Миср фатхида иштирок этдилар. Шомда ва Фаластииннинг Рамла деган жойида истиқомат қилдилар. Сўнгра бу ердан Хумсга кўчиб ўтдилар. Ҳижратнинг 54-санасида ана шу ерда вафот этдилар. Савбон ибн Юждуд ривоят қилган ҳадисларни уч «Саҳиҳ» соҳиблари ўз китобларига киритганлар.

Савбон розияллоҳу анҳу Пайғамбаримиз соллаллоҳу алайҳи васалламнинг хизматларида юрган пайтларида, бир куни одамлар у кишидан Аллоҳга энг маҳбуб амал ҳақида сўрадилар. У киши сукут сақлаб, жим қолдилар. Яна савол берилди. Савбон розияллоҳу анҳу яна жим эдилар. Одамлар Аллоҳга энг маҳбуб амал ҳақида учинчи марта сўраганларида, ушбу биз ўрганаётган ҳадисни айтдилар.

Бу ҳадисда Пайғамбаримиз соллаллоҳу алайҳи васаллам доимо Аллоҳга сажда қилишни, яъни намоз ўқиши тавсия этмоқдалар. Зотан, намозсиз сажда бўлмас. Шу билан бирга, ҳар бир сажда туфайли сажда қилувчининг даражаси бир поғона кўтарилиб, хатоларидан биттаси ўчирилиши ҳам таъкидланмоқда.

Демак, намоз нафақат гуноҳларнинг ювилишига, балки даражаларнинг кўтарилишига ҳам хизмат қилар экан.

Демак, Аллоҳнинг ҳузурида даражамиз юқори бўлсин десак, кўпроқ намоз ўқиб, саждаларимизни кўпайтирайлик. Ҳар бир саждамиз туфайли даражамиз бир поғона кўтарилса, қандай яхши!

Хатоларимиз ювилсин, десак, яна кўпроқ намоз ўқиб, саждаларимиз сонини кўпайтирайлик. Ҳар бир саждамиз туфайли бир дона хатоимиз ювилса, қандай яхши!

«Ҳадис ва ҳаёт» китобининг 4-жузи асосида тайёрланди.